



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

tiryimiyim@aolima

tir yimiyim

TAPAK 10

Sonia Gandhi-i Meghalaya Congress tir asütsü Pala shim

US Open nung Venus Williams masayatsü



VOL. XVIII NO. 314 (ADOK 314) DIMAPUR

ROGONÜ (FRIDAY)

LUROI (AUGUST) 27, 2021

₹ 5.00

Nagaland COVID-19: Taneptsü angur 84 aser tasen putetba 60 liasü

Kohima, Luroi/August 26 (TYO): Nagaland nung anogo trok buba COVID-19 tashidak putetba dang nungi taneptsü angur timba arur, aser yamaji state nung Brehostibarnü iba tashidak nungi taneptsü angur nisung 84 liasü aser cases tasen 60 puteta tang tashinung iba virus agi meneper nisung 29,778 alitsü. "Tesüiba ghonda 24 tsungta state nung COVID-19 agi menepa alir nisung 84 taneptsü angur - Kohima nungi 35, Dimapur nungi 24, Mokokchung nungi 20, Zunheboto nung pezü aser Peren nungi ka," ta State Nodal Officer for Integrated Disease Surveillance Project, Dr Nyanthung Kikon ajanga anogoshi sangdongba COVID-19 bulletin nung ashi.

Iba ya ajanga state nung COVID-19 tashidak nungi taneptsü angur nisung 27,457 akumer aser taneptsü anguba rate ya tajungba kuma shilem 92.20 nung lir, koba Bodhbarnü shilem 92.10 liasü.

"Tanü COVID-19 positive cases 60 jangjatetba ya Zunheboto nungi 17, Dimapur nungi 12, Kohima nung 10, Mokokchung nunga 10, Mon nung pezü, Longleng aser Phek nung asem-sem aser Kiphire nung ka alitsü," ta pai ashi.

Tang active cases 845 alitsü, aser item rongnung temang nung timtem sümia agütsüba 138, tera timtema oxygen nung 14, kanga sashia kangshia oxygen nung 9, ICU nung ventilator maden nisung pongu, ventilator inoker nisung ter aser nisung 669 dak

iba tashidak agi timtem agütsüba mali, ta Dr Kikon-i ashi.

Brehostibarnü state nung COVID-19 agi nisung asüba kata meliasü, anungji tang tashinung iba tashidak keter asür nisung 612 alitsü aser item rongnung nisung 14 bo danga tashidak agi asüba alitsü, ta pai ashi.

Ajak senteper COVID-19 agi shiranger nisung 864 tashi danga state temi anir ogo, ta ashi.

Tang tashinung Nagaland nung COVID-19 tashidak alitsü südi ta temolung melemteti sample 311,636 tashi tendangogo. Item ya RT-PCR nung 105,949, TrueNat nung 74,449 aser Rapid Antigen nung 131,238 tendanga lir, ta Dr Kikon-i ashi.

Mongulbarnü tashinung Nagaland nung nisung 652,534 nem COVID-19 mozü doses 843,564 agütsüogo, ta State Immunization Officer, Dr Ritu Thurr-i metetdaksü.

State nung iba mozü agir alirtem ya frontline nung inyaker nisung 60,848, healthcare nung inyaker 15,989, arishi küm 45 nungi tema nisung 192,057 aser arishi küm 18 nungi 44 tsungta alir nisung 383,640 alitsü, ta pai ashi.

Nisung 191,030 nem iba mozü dose tanabuba agüja parnok vaccination course tembangogo. Parnok rongnung frontline nung inyaker 43,740, healthcare nung inyaker 12,877, arishi küm 45 nungi tema nisung 112,911 aser arishi küm 18 nungi 44 tsungta nisung 21,502 alitsü, ta Dr Thurr-i ashi.

Kabul airport kima tanur densema nisung 13 pokset

Kabul, Luroi/August 26 (Agencies): Brehostibarnü Kabul airport kima bomb ana apokba sülen nisung 13 poksetba den nisung aika yiruogo. Osang ajanga ashiba agi, bomb apokba lendong nung US military personnel tema kar yirua liasü.

Kabul airport kima bomb apokba lendong nung tanurtem densema nisung 13 poksetogo aser Taliban mitkartem aika yiruogo, ta Taliban ketdangsür kati Reuters dang ashi. Iba ita tetenzüklen Taliba-i linük amokbangba sülen linük toktür jena aotsü atema nisung meyirejang aika airport kima adenshia lir.

US aser allied ketdangsürtemi ashiba agi, airport amaksü atema pei temang nung bomb alenoker pokdaksürtemi tasa asadar ta itangitertem nungi osang angazüker liasü, ta Pentagon-i ashi.

Tir Joe Biden nem airport kima bomb apokba indang metetdaksüogo, ta White House ketdangsür kati ashi. Security ketdangsürtem den Afghanistan

tensa dak sendakba nung Biden senden ka mena aliba mapang mezüngbuba bomb apokba indang osang angazük, ta iba ken o jangja alir kati ashi.

Taliban otongdar Zabihullah Mujahid-i ashiba agi, parnoki ISIS kiralongrartemi Kabul airport amaksü akok ta Americans nem osang agüjatoker liasü.

"Alima kin tem dang nangzükba benoka inyaksü atema Taliban bendanga agütsür lir aser Afghanistan tamendakdak ser kiralongrartem inyaksangshitsü memelatsü," ta Taliban otongdari ashi

August 31 nü sepaitem ajak mainshi tsungda nüburtem pei linük bushia yoktsü atema United States kanga aritepa inyakdar.

Linük aikati pei nüburtem dang airport-i maotsü mepeshia metetdaksüogo, kong bomb apokba lendong ataloktsü akok ta ketdangsür kati shiogo. Ajsüaka Afghanistan toktür aotsü anogo mesera ghonda ishika dang lia aikati tetuyuba sülen mani daker.

Yimtsüng 170 nem Horti Dept-i metsüjang agütsü tenzükogo

Dimapur, Luroi/August 26 (TYO): MIDH 2021-22 aser NEC 2020-21 kübok mongpu nung amshiba metsüjangnatsü alemba sentong ka Advisor, Horticulture and Border Affairs, Mhathung Yanthan ajanga August 26, 2021 nü Directorate of Horticulture, Kohima nung tenzüksüogo. COVID-19 tashidak sülen rongsenketzung shia arutsü asoshi inyaksü atema yimtsüng shimteter item metsü ya lemstür.

Iba sentong nung tesemdanger tongti ka ama jembiba mapang, sanction meliaka department-i mera tali agia mapang shidak nung mongpu nung amshitsü metsüjang bener aruba asoshi Yanthan-i pelaba lemsatop. Mapang shidak nung aluyimer ket tongtsütsü mechi metsüjang ya department-i apur aliba alitsü.

Tashidak wara agi tesem ajunga sünger aliba mapang asen asoshi peria züsentetsü aser ano market nung yoka senotsü ajangzüksü atema Naga nungeri lesson tulu angazükogo. Ijabi ngur Chief Minister-i anir mera balala agia iba sentong ya yanglu,

ta pai ashi.

Nagaland nung nüngdakba dang nungi tali züsenteter, saka market tajung mesüra post-harvest technology tajung mali aser market mesema aoba mali, ta pai ashi.

Shishilempaba tsütsü aluyimer dang farming inyaksü ajungshitsüla aser parnok ya entrepreneur ama züngshitsüla, aser iba atema department-i aluyimer nem service agütsütsüla, ta Advisor Yanthan-i ashi.

Paisa department aser aluyimer dang Air cargo facility ya tajangzük asoshi amshitsü ayongzük, koba tangbo ajak atema angur.

Yanthan-isa nüburtem dang department aser agency balalai facility aser teyari agütsüba maongka agütsü ajungshia liasü.

Agriculture Production Commissioner, Y Kikheto Sema, IAS ajanga sentong tenzüka jembiba mapang, tashidak wara agi tesem ajungalen timtema aliba mapang department-i anibelem mesasai aluyimer atema inyaksüba aser yimtsüng 170 atema jelia mongpu nung amshiba

metsüjang balala anepaluba asoshi tenüngsang agüja liasü.

Paisa aluyimer dang metsüjang ya tarutsü nung amshitsü atema meraksai rizünga ayutsü ajungshia liasü.

NEC ajanga 2020-21 atema sen agütsüba kübok Department-i aluyimer nem küm tepiyong atema aonsotsü metsüjang tajung agütsü, district 11 kübok kibong 10,000 awajema 'vegetable village' 100 jangjatet, aser MIDH kübok 2021-22 mapang ali hectare 1,000 nung aonsotsü yoka item yimtsüngtem ya Department ajanga 'Vegetable villages' ta adopt asü aser kharif aser rabi season atema aonsotsü metsüjang teyari agütsür.

Tang tashinung district tanubusang, Noklak densema district ajak nungi yimtsüng 70 dak tema Vegetable village lir.

Yimtsüng nung aonsotsü züsenba jenjang tali kumdaktsütsü aser ano aonsotsü ayokba ajanga yimdaklir ajangzükba den külemi parnok achi-ajemtsü atema aonsotsü peria lidaktsütsü nükjidong nung iba 'Vegetable villages' sentong ya tenzüka liasü.

Reckitt aser Nagaland sorkar na tenangzüktepba yanglu

Dimapur, Luroi/August 26 (TYO): Consumer-healthcare company Reckitt-i, tanur arishi küm 10 nungi 19 tsungda alirtem atema Nagaland nung 'The Birds and Bees Talk' programme amenokogo.

Tenangzüktepba nung Principal Director, School Education Department, Government of Nagaland Shanavas C. (IAS) aser Director of External Affairs and Partnerships, South Asia, Reckitt Ravi nati sign süa liasü.

Birds and Bees Talk (TBTT) programme ya comprehensive growing up, life skills education curriculum ka lir aser iba ajanga tanurtem nem osang tongtibangtem agüja khuret angatetba nisung kaka küma aintsü asoshi teyari agütsür.

Manipur, Sikkim aser Arunachal Pradesh state sorkari teyari agüja taoba küm amenokba sülen Birds and Bees Talk programme kübok 2-level interactive, animated curriculum ka lir aser iba ajanga ina aoba aser life skills, inclusion core principles ajungkettsü, awareness, consent, tekümzükba aser equity onüktem ayimjemer.

Taküm iba sentong ya Nagaland nung aliba tinlonglong aser lanurtem meyirejang aika atema curriculum ka benoka osang tejangja agütsüba ajanga lenlang shidak shimtsü aser khuret angatetba nisung kaka küma intetdaksütsü atema rangloker inyaksü. Iba sentong ya Nagaland sorkari sorkar aser private school tem ajak nung benoka inyaksü.

Sentong amenokba mapang Principal Director, School Education Department, Government of Nagaland Shanavas C. (IAS)-i, "Nagaland nung iba comprehensive program; The Birds and Bees Talk benokba atema nemadanga bilemer, koba state nung mezüngbuba aser tanga sentongtem dang nungi khenyongi balaka. Iba sentong ajanga state nung adolescents' mental health aser sexual health dak sendakba nung tebilemstü aliba bentetsü. Onok nüklaji, tarutsü tajungba ka asoshi lanurtem renemtsütsü asoshi lir. Iba sentong takok asoshi department-i teyari ajak agütsütsü aser iba telongjem tejakdangi bener aotsü," ta ashi. (Maneni tapak 2 nung...)

Naga nunger ajungai Naga Hoho nungittsüla: Naga Hoho of Arunachal

Dimapur, Luroi/August 26 (TYO): Naga nunger tsungta kati ka asoshi bilemstütsü, Naga nunger libaliru wazüka ayutsü, loktiliba, sobaliba, rongsenketzung aser yimtenren temaba jenjangi ajungkettsü nükjidong yur kin balala indang Hoho nung amendaker Naga Hoho ya Zunheboto nung 11-12 March, 1998 session nung tenteta liasü, ta Naga Hoho of Arunachal Pradesh sangdong ka ajanga ashi.

Naga nunger telok balala tsungta rarabangsen adoka aliba tensa aziükba nung Naga Hoho-i shilem tulu agia arur aser ano Government of India aser NSCN tsungta yimjung maparen nunga Naga Hoho-i tongti shilem agia aruogo, ta parnoki ashi.

Naga nunger yimtenren tsütsü tangatetep ajunga nung Naga nunger telungpur telok ajak

adentsüla ta Naga Hoho tangatetba nung maparen temelaba kumdaktsür shilem agia arur aser Naga Hoho ya yimjung ken o jembiba nung meliaka item nükjidong tongtetsü asoshi mera balala agia arur, ta ashi.

Rasaa meshiteti Naga nungeri külem Naga nunger tepsettepba tensa tia nung Government of India den yimjung ken o jembiba nung tamakok ajurutsü jenjang aiben ajuruogo, saka item mapang ajak nung Naga Hoho-i shilem tajung agia lungjemshidaktsü.

Naga nunger ajunga kumzüka ayutsü mechi kin, council mesüra region telemdang makai Naga Hoho-i ammag milen tsükloka Naga nunger ka kuma lungjemdaksü, ta Naga Hoho of Arunachal Pradesh sangdong ka ajanga ashi.

Assam aser Manipur state nunga yimjung ken o jembiba maparen nung shilem agia arur. Parnoki Arunachal Pradesh semdangtsü sentong lir.

Naga Hoho tashi ya kin balala indang Hoho nungi lir ta onoki amanger, anungji Naga Hoho tashi itshitsü, aser talisa parnoki arütsü makai lungjemshitsü asoshi meranga inuakba nung Naga kin ajungai nungita yaritsüla, ta ashi.

Tang yimjung ken o jembiba tatemlen kati aruba mapang kin balala indang Hoho, civil society aser Naga nungertemi Naga Hoho nungittsü ajungshir. Government of India aser NSCN (IM) aser NNPGs 7 tsungta yimjung aser pangzüng tatembang ka renemtsü asoshi Arunachal nung aliba Naga nungertemi maneni Naga Hoho nungittsü, ta sangdong ajanga ashi.

Imnatiba-i Mkg Dist Skill Committee den sensaksem aka



Advisor Imnatiba-i District Skill Committee Mokochung züngsemtem den ADC planning conference hall nung sensaksem akadang tangokba noksa nung angur. Mokochung, 26th August, 2021

Mokochung, 26 Aug (TYO): Industries & Commerce, Labour and Employment, Skill Development & Entrepreneurship (GoN), Advisor, Imnatiba-i Aug 26 nü District Skill Committee, Mokochung züngsemtem den Mokochung ADC Planning Conference Hall nung sensaksem tajung kaogo.

Imnatiba-i iba mensem nung jembidang, India aser state sorkar-i maparen balala inyakba mapatong kar lemsatepba den

state nung rongsenkettsüing jenjang ajungkettsü asoshi aroki senteper inyaktsü asoshi tayongzükba ka agütsü.

Küm ana tashi alima tensa tia mesüngjemba ajanga maparen aika satema inyaka moteter, aji oda süaka, teimla mesamai tajungtiba agi inyaktsü asoshi paisa ketdangsurtem ajungshia liasü.

Nagaland rongsenkettsüing ya itasen dak metaloka lir, Govt. of India-i teyari balala yokba teimba shilem itasen nung aor,

iyongji terenlok mapa inyaktsübo senotsü manünger, tanü state jenjang ji tarulen ishiba aser taolen teimba, anungji, asen lima rongsenkettsüing atemaji aroki shilem agitsüla, ta paisa khuret kar lemsatep.

Pei district dak apet sentongtem yanglua lanur sempet aketertem anitena parnokji lenmang ka mesüra ka nungbo mazüngi yutsütsüsa maparen kar inyaktsü asoshi paisa District Skill Committee nem inyaktaktsünüba o shisem.

AR-i anentsüh merektetba nung teyari agütsü

Dimapur, Luroi/August 26 (TYO): HQ IGAR (North) tawabangba kübok Assam Rifles Kiphire Battalion-i August 18 nungi 25 nü tashi Kiphire District kübok Pungro-Longkhimong yimtsü nung anentsüh merektetba nung Public Works Department nem teyari agütsü liasü.

August 17 nü Longkhimong yimtsüing anasa Pungro-Mimi axis kolak nung anentsüh tulu ka alua arrtsü nung aliba yimtsüingtem leni aoba lenmang nokdanga liasü. Longkhimong Village Council-i lenmang

merektettsü atema Assam Rifles dang teyari meshi, kechiyong iba lenmang ya parnok asoshi kanga tongtibang aser iba lenmang nokdanga aliba ajanga yimdaklirtem dak kanga mejungi kongshitsü.


Osang angazükba sülen Assam Rifles-i Public Works Department, Pungro nem teyari agütsü parnok ket nung aliba JCB yok. Tzünglu anen matai maparen inyak tenzük aser Kiphire Battalion-i maparen ajak achaayanga liasü. Public Works Department ket nung totzü peria maliasü anungji JCB maparen

maneni inyaktsü atema Assam Rifles-i teyari agütsü liasü.

Kasa mapang nung hume pipe ka nembanger aliba dena merektettsüogo. Yimdaklirtem, Public Works Department Pungro aser Assam Rifles longjemer iba lenmang anogo tenet nung merektetba liasü. Lenmang merektetba mapang Village Council züngsemtem densema yimdaklir nisung 8-i teyari agütsü aser mapa nung teka amoka inyakba yimdaklirtemi Assam Rifles teyari asoshi kanga pelaba lemsatepa liasü.

Reckitt aser Nagaland sorkar na...

(TAPAK 1 NUNGI...)



Kasa mapang nung Director of External Affairs and Partnerships, South Asia, Reckitt Ravi Bhatnagar-i ashiba agi, "India ya lanurtem linük ka lir shirnoki nütsünyongyongsük shilem 60 kümteter. Osang tejangja, education aser awareness agütsüba ajanga linük tarutsü yangertsü aser lokti nung nüngdaka aliba temelenshi bener arutsü. TBBT amenoktsü atema Nagaland sorkar den longjemba atema nümadanga aser tushi bilemer. Music, arts, aser sobaliba amala non-traditional inyakyimtem benoka onoki lanurtem den sendakteper. Taküm onoki tesayurtem training atema yangluba e-learning system amala benoka

tebilemstü bentettsü asoshi rangloker inyaktsü. Education aser awareness ajanga lanurtem mulungsensü melenshitsuitsü onok nükjidong lir."

Tanga state tem den mesüktepa iba sentong ya PLAN India-i North East nung aliba state 6 nung benoka inyaker. Iba curriculum kübok züngoksema aliba school tem nungi tesayurtem shimtsü aser tesayuba inyakyim aser lesson tem densema tongtibang tenüngdakbatem agi parnok renemtsütsü.

Iba sentong kübok ghonda 27 lesson agütsütsü koba school temi küm tsüngda sayutsü. Iba sentong yagi tanurtem critical thinking aser analysis aser

informed decision-making amala tongtibang skill tem renloka aoba nung teyari agütsütsü.

Curriculum ya tongtibang onük 14 küma lemsar lir aser jenjang ana nung angutsü; arishi küm 10 nungi 14 aser 15 nungi 19. COVID wara ajanga tangazükba aser terenlok nung tetsükdaktsü madokdaktsütsü atema digital ecosystem ka yanglua benokdar. Iba programme digital ecosystem kübok state tem nung kaketshirtem nem tangazükba agütsütsü atema e-learning platform ka densema lir. E-learning platform nem AI-enabled chatbot ka, podcast channel ka aser website ka ajanga teyari agütsütsü.

NTA-i Director Ajanuo Belho nem tenüngsang agütsür

Dimapur, Luroi/August 26 (TYO): Japan aser India tsüngta lenla balala nung angatetepa inyaktsü asoshi Ajanuo Belho, Director, Department of Tourism, Government of Nagaland ajanga jenjang tajungba yanglutsüba atema "Japanese Foreign Minister's Commendation, 2021" sempet agütsüba asoshi Nagaland Tourism Association-i tenüngsang agütsür, ta sangdong ka ajanga ashi.

Japan aser India tsüngta

tesendaktep tajungba kumdaktsütsü asoshi nai anibelem mesasai inyakba yagi industry nung alir ajak ajungmesor aser atangji nung iba sempet ya nai meranga inyakba den tesütep lir, ta ashi.

Nü mapa asoshi Nagaland Tourism Association ajanga nüdang kanga pelar aser nai linük ana tali telungjemba akumtsü asoshi maneni meranga inyaktsü imla atar, ta Nagaland Tourism Association ajangasa ashi.

Mokochung nung 2buba quarter district review senden menogo



Dimapur, Luroi/August 26 (TYO): Department of Health & Family Welfare Mokochung-i August 26 nü 2buba quarter District Review senden ayongzükba menogo. Iba senden ya Dr. Aonungdok Dy. CMO, Mokochung lenisüba nung CMO Conference Hall nung 10:00 ako nungi tenzükba agia liasü.

CMO Mokochung Dr. R. Chubala Aier-i, senden nung dena alir ajak pelashishia agizük aser wara pokteter aliba mapang pei akokba yari tajungtiba inyakba atema kanga pelaba metetdaksüba den district nung covid vaccine nüburtem shilem 75 nem agütsüogo ta ashi. Laisa, mapang shidak nung tashidak mena alir bushiyonga aoba aser asadanga aliba ajanga COVID-19 tashidak azüoktetogo ta ashiba den District Task Force, ward / Village council chairman, ASHA aser AWW tem teyari ajanga iba sentong takok nguogo ta ashi.

Kasa mapang nung Dr. R. Chubala-i, wara mesüshi lir aser hopta ishika meranga inyakra district nung nütsünyongyongsük shilem 90 nembo vaccine agütsütsü, ta ashi. Lai, vaccine agütsüba percentage dak masü saka vaccine magi aliba nüburtem dak rangloksü ayongzükba liasü.

Maneni lai, tashidak mapang shidak nung tendanga temang anepaluba, contract tracing aser

parnok kübok aliba health unit tem junga asadanga alitsü koda tongtibang, iba indang lemsatepa liasü. Laisa, senden nung dena alirtem dang wara den raratsü atema meranga inyaktsü aser district nung maparen takok asoshi tasa tasen benoktsü ajungshia liasü.

Senden nungsa Dr. Ayangla Saku DPO (UIP & RCH)-i vaccine agütsü aser micro planning tapet benoktsü koda tongtibang iba indang lemsatep. Maneni Dr Aonungdok Dy. CMO-i Mokochung district nung COVID-19 indang power point presentation ka agütsü. Angelina Jungi, surveillance coordinator, NISHTHA surveillance, JHPIEGO-i Integrated Health Information Platform(IHIP) indang jembisa aser Limatenzuk district Coordinator (AB-PMJAY)-i Ayushman Bharat scheme kübok inyakyim aser beneficiary tem indang Power point presentation ka agütsü.

CHCs & PHCs, SMOs & MOs temi monitoring areas, Covid-19 vaccine agütsüba aser tendangba, Community covid 19 Care Centre jenjang, VHND's conducted aser tenüngdakbatem indang power point presentation agütsü.

Iba seden nung Programme Officers, Medical Officers, DPMU staff aser IEC personnel tem ajak dena liasü.

Social statistics training sentong tenzükogo

Kohima, Luroi/August 26 (TYO): Support for Statistical Strengthening (SSS) Scheme 2021-22 kübok "orientation training on social statistics including vital statistics" omen nung ajemdaker anogo ana training sentong ka tenzükogo. Iba sentong ya Directorate of Economics & Statistics, Nagaland Kohima-i ayongzükba Directorate Conference Hall nung agidaki.

Training sentong nung o jembiba mapang Additional Director & HOD Neidilhou Angami-i, training nung shilem agirtem dang iba sentong süoki ia agütsü ayongzükba den iba

amala training sentong ayongzükba agiba ajanga department nung inyakertem pei mapa tajungba inyaktsü atema arantgetshitsütsü, ta ashi.

Paisa, sentong nung onük balala nung jembitsü aliba shisalen agütsürtem ajak department ketdangsurtem dang asüba tepela lemsatepa liasü.

Kasa mapang nung Joint Director aser SSS Nodal Officer Charles N Kikon-i, Support for Statistical Strengthening (SSS) Scheme nükjidong lemsatepa liasü.

Iba sentong ya Deputy Director & Programme Officer (Training) Kezhalelhou Solo lenisüba nung agia liasü.

AAPSU-i Chakma, Hajongs nunger state adena orr lidaktsütsü sentong yangluba pelashishia agizük



All Arunachal Pradesh Students Union (AAPSU) tanishirtem (file photo)

Itanagar, Luroi/August 26 (Agencies): Arunachal Pradesh sorkari Chakma aser Hajong nunger refugee tem state adena orr lidaktsütsü asoshi sentong aliba All Arunachal Pradesh Students Union (AAPSU)-i pelashishia agizükogo.

"Chakma aser Hajong nunger refugee tem Arunachal adena orr lidaktsütsü atema Chief Minister Pema Khandu-i tawa jembiba ya otsüsüsüka lir, kechiyong AAPSU aser state nung aliba nürburtemi iba atema küm aika raraa aruogo," ta union general secretary Tobom Dai-i ashi.

Osangbenertem den sensaksemba mapang Dai-i, "Chakma aser Hajong nungertem ya state nung aliba local tem nem jelia osang magütsüi 1964-1969 küm anir aru.

"AAPSU-i Arunachal nung Chakmas aser Hajongs nunger lidaktsüba anema nokdaka aruogo, kechiyong parnok aliba ajanga district tem nung nütsünyongyongyök dak sendakba nung temelenshi adokogo aser state nung lisopurtem den parnok

inyakyim meshidak," ta pai ashi. Dai-isa, Union law minister Kiren Rijiju-i Indian constitution kübok refugee ken o dak sendakba nung teti atema telemetba ka agütsü jembiba atema pa nem tenüngsang agüja liasü.

"Chief minister aser Union law minister nati kanga tasü ita jembibogo aser iba ya otsüsüsüka lir. Iba olen ajanga AAPSU aser Arunachal nung aliba nürburtem akasodaktsür, shirnok küm aika iba ken o atema raraa aruogo," ta Dai-i ashi.

Linük nüjiso anguba anogo o jembiba mapang Chief Minister Khandu-i, "Ozüng alema arua aliba Chakma nungertem ajak Arunachal Pradesh adena anir oa lidaktsütsü aser iba ken o ya Union Home Minister Amit Shah den sensaksemogo," ta ashi.

Kasa mapang nung Rijiju-i, Arunachal Pradesh lisopurtem temeden wazüka ayutsü nangzükba den state nung amenoker aliba bendangertem Citizenship (Amendment) Act kübok permanent residence ta mezüngshitsü, ta ashi.

Ajisüaka Dai-i, Khandu aser Rijiju napronglai tenati jembiba o ya mapa küma inyaka sayutsüla ta ashi.

"Onoki terenlok kanga kümdanga asadanga atatsü," ta AAPSU general secretary-i ashiba den Ato Kilonser Narendra Modi aser Shah dang Arunachal Pradesh nung aliba nürburtem atema Khandu aser Rijiju nati jembiba olen ya asangsang nung mapa küma odaktsütsü mepeshia liasü.

Khandu aser Rijiju nati jembiba olen nung Chakma Development Foundation of India (CDFI)-i telangzüba agütsüba dak sendakba nung Dai-i, Arunachal nung melidanger aser ken o mejangjaba Chakma aser Hajong lenirtemi inyakyim ajak raksatsütsü meranger, ta ashi.

"Indian Constitution kübok teti atema telemetba ka agütsü khanga aruba Chakma aser Hajong lenirtemi dang iba anema nokdaker. Osang tai prokshiba aser national aser international forum tem nung state nungi minister tem aitsüba nungi pila alitsü nüngdaker," ta Dai-i ashi.

Kasa mapang nung Union tir Hawa Bagang-i, AAPSU aser Arunachal nungertem Chakmas aser Hajongs nunger kodanga magizüktsü aser ali inch ka danga magizüktsü ta jangja jangja metetdaksüogo, ta ashi.

CDFI aija Bagang-i, nürburtem rongshitsü melena Chakma nunger lenirtemi iba ken o teti atema bentetsü asoshi state aser centre sorkari maparen balala benok inyakba agizüktsüla, ta ashi.

Manipur: Churachandpur nung 'Air Quality Monitoring Station' amenokogo

Imphal, Luroi/August 26 (Agencies): Mopung jenjang asadangtsü atema Manipur Pollution Control Board (MPCB) mendenbuba, L Radhakishore-i, "Ambient Air Quality Monitoring Station" sentong amenoktsüogo.

Deputy Commissioner, Churachandpur office complex nung sentong agiba mapang air quality monitoring station dena amenoktsüogo.

Iba station ya Central Pollution Control Board (CPCB), National Air Monitoring Programme kübok amenokogo.

Iba system ajanga temperature, humidity, rainfall, wind speed, wind direction aser solar radiation amala meteorological parameters aika asadangtsü.

MPCB mendenbuba, Radhakishore-i ashiba agi, küm ishika tejakdangbo Churachandpur district nung tzümopung kanga tajung liasü.

Ajisüaka kümtem tsüingda nütsünyongyongyök timba akümba aser arem leprepa aoba ajanga state kübok tanga tesemtem ama environment aser ecological balance nung kongshio, ta pai ashi.

Temelenshia ya tilaka dang amai saka iba ajanga global warming nung kongshir aser state nunga kümtem tsüingda temperature timba akümba ajangshia arudar, ta MPCB mendenbubai ashi.

"Nürburtem liyonga aotsü

atema tzümopung wazüka ayutsüji kanga tongtubang. Asenoki iba ya sentoka toktsüra iba ajanga health dak kongshiba dang masü saka talitsü tamakoktsü akümtsü. Tzümopung jenjang tamajungba küma aoba ajanga süngtong litong aser shiruru aika samaogo," ta pai ashi.

MPCB mendenbubaisa, CPCB-i state nung ibala mesükba station 12 amenoktsü agizükogo aser iba sentong kübok taoba mapang Bishnupur aser Imphal East districts nung station tem amenokogo, ta ashi.

Iba station ana (online mode) dak alia Manipur University aser Dhanamanjuri University nunga kasa inyakyim ya benoka inyakdar, ta pai ashi.

Maneni pai, station tem nungi bendenba data tem ya ita shia Ministry of Environment, CPCB aser iba dak sendaka aliba ketdangsurtem nem agütsür, ta ashi.

Centre sorkari district ajak dang DC, SP aser Member Secretary ama MPCB Officer densema District Environmental Action Plan (DEAP) tentetsü tetuyuba agütsüogo.

DEAP-i agizükba onüktem Ministry dangi yoktsü aser iba dak ajemdaker Ministry-i project balala benoka inyaktsü, ta pai ashi.

L Radhakishore-isa, district nung tzü jenjang asadangtsü atema aser noise pollution azüoktsü asoshi hadirtem yakta amenoktsü ta ashi.

Sonia Gandhi-i Meghalaya Congress tir asütsü Pala shim

Shillong, Luroi/August 26 (Agencies): All India Congress Committee (AICC) tir Sonia Gandhi-i, Meghalaya Pradesh Congress Committee (MPCC) tir asütsü atema Shillong MP aser taoba Union minister Vincent H Pala shimogo.

Iba osang ya AICC secretary KC Venugopal-i osangbenertem den sensaksemba mapang metetdaksü.

Vincent H Pala-i MPCC tir Dr Celestine Lyngdoh melentsü.

Congress tir-i Meghalaya Pradesh Congress Committee tir asütsü MP Vincent H Pala shimogo, ta Venugopal-i ashi.

Congress tir Sonia Gandhi-isa, Meghalaya Congress working presidents asütsü atema MLA ana densema party lenir asem shimogo.

Tang shimba Meghalaya Pradesh Congress Committee (MPCC) working president tem

rongnung taoba education minister aser East Shillong MLA Ampareen Lyngdoh; Mendipathar MLA Marthon Sangma aser James Lyngdoh densema lir.

"Party-i mapa toktsüba tir Dr Celestine Lyngdoh dang pa mapa tajung asoshi kanga pelar," ta kasa sangdong ajanga metetdaksü.

Kasa mapang nung All India Congress Committee (AICC) secretary mapa nungi Ampareen Lyngdoh nem anisüngzük agüja atar, ta Venugopal-isa ashi.

Rajasthan Congress lenir aser taoba Union minister Sachin Pilot-i Twitter ajanga: "Meghalaya Pradesh Congress Committee tir mapa atema shimba atema Vincent H. Pala nem tenüngsang agütsür. Maneni Meghalaya Congress Working Presidents asütsü shimertem mapa tajungtiba inyaktsü imlaja atar," ta ashi.

Assam-Meghalaya arrtsü nung mangatettep adok

Guwahati, Luroi/August 26 (Agencies): Assam-Meghalaya arrtsü nung state ana security personnel tem tsüingda mangatettep adokba sülen tensa mejungi kümogo.

Osang ajanga ashiba agi, state police tem tsüingda mangatettep ya Assam, Karbi Anglong district Umlapher tesem nung atalok, koba Meghalaya indang Ri-Bhoi district den atongtepa lir.

Mongolbarnü nungi iba tesem nung tensa mejungi liasü. Meghalaya kübok Ri-Bhoi district nungi lanur asem dak Assam police temi azükba sülen iba tesem nung tensa mejungi aküm.

Osang ajanga ashiba agi, Hombarnü aonung Meghalaya, Ri-Bhoi district Umlapher yimtsü nung alir lanur asem dak Assam police-i züka liasü.

Iba tatalokba sülen Assam-Meghalaya inter-state arrtsü nung tensa tanem tanemi tamajungba kümyonga ao.

Bodhbarnü Meghalaya nung alirtem aika Karbi Anglong district kübok Umlapher anasa Assam leni aitsü merangba sülen tensa kanga mejungi aküm.

Meghalaya nungertem Assam-i tashiyim agi aitsü merangba sülen Assam police ketdangsurtemi parnok meyipa yoka nokdangtsü merangba mapang state ana security personnel tem tsüingda mangatettep adok.

Osang ajanga ashiba agi, tensa azüoktsü merangba mapang Meghalaya nungi deputy superintendent of police jenjang nung aliba ketdangsur ka yirua liasü.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

No. DTE/MIN/4/2013/9 Kohima, dated the 26th August, 2021

NOTIFICATION

(Post-Matric Scholarship and Merit-cum-Means based Scholarship)

Ministry of Minority Affairs (MoMA) provides an opportunity to the students belonging to six Minorities communities notified by the Government of India (Jain, Buddhist, Sikh, Zoroastrian (Parsis), Muslim and Christian) for availing scholarships under two scholarship schemes viz. Post-Matric and Merit cum-Means based Scholarship for the year 2021-22. The Department "Directorate of Technical Education", The Government of Nagaland invites applications for above scholarships, given by the Ministry of Minority Affairs, Government of India for the above schemes". The scholarship portal www.scholarships.gov.in is now made live for the said scheme(s).

Timeline:

Last Date for submission of online applications for Fresh scholarship (first time applicant) and Renewal scholarship (applicant who has got scholarship during 2020-21) by students.	i. Post-Matric Scholarship & ii. Merit-cum-Means based Scholarship	31th Nov., 2021
--	---	-----------------

Eligibility:

- * The applicant should be the student of the notified minority communities (Jain, Buddhist, Sikh, Zoroastrian (Parsis), Muslim and Christian).
- * The applicant should be pursuing studies in India in Government or recognized Private University/ Institute/ College/School.
- * The course being pursued should be of Minimum one year duration.
- * The applicant should have secured 50% marks in the last annual Board/ Class examination.

For Applicants

- * Applicants are advised to apply online against any one of the scholarship schemes on the website of National Scholarship Portal at www.scholarships.gov.in
- * Detailed 'Instructions' for filling in online application and 'Frequently Asked Questions (FAQ)' are available on the National Scholarship Portal homepage.
- * Applicant is advised to give only that bank account details which remains in active mode compliant as per bank's instructions so that payment of Scholarship does not fail.

For Universities/ Institutes/College/School

- * Last date for Institute to scrutiny and verify student application: 15th Dec, 2021.
- * Institutes are advised to complete their aadhaar based KYC for the current session 2021-22 by logging in to National Scholarship Portal (www.scholarships.gov.in)
- * All Universities/Institutes/Colleges/Schools, where a minority student is studying, should get themselves registered (if not done earlier) on National Scholarship Portal
- * It has been noticed that a good number of student's online application gets unverified at the Institute Level. Institutes are advised to regularly forward online application as in when student apply for the scholarship.
- * For any query, one may mail their query addressed to Nodal Officer- Er. UnotoKinimito minoritynagaland@gmail.com

**(NUNGSANGMENLA IMCHEN)
(Ex-Officio Director)**

Issued by DIPR



TIR YIMYIM YIMOBILEM (EDITORIAL)

DIMAPUR ROGONÜ, LUROI (AUGUST) 27, 2021

Tesayur mali, tangazükner a mali !

Alima nung sen mali masü saka lir ser nung asenoki tebusi mashiba agi mangur. Talisa tanü lanurtem sen mangu timtembaji mapa inyaksü manguba agi lir aser mapa manguba tiaji tesayur-a mali, tebusia mashi aser tangazükna mangazükner ta asüba agi ajurur. Ashiko, aji dang masü lanurtem aikati mapa-a meinyaknüi alitsüa akok, iba jagi mapa mangur masü saka ngur meinyaknüba purtema alitsü sudi. Ashi, alima nung teinyakang meinyakmar dang ashi, kodaser nisung ka atema teinyaksü mapa kecha makatsü ? Ano, tanübo tajung kaji among adena mapa bushia jajatsü masü saka kidang nungi mobile phone ajanga online nung mapa bushia inyaktettsü. Ibayongji, tanü asung amshiba mobile phone dang smart phone ta ajar, kechiyong ajak den o jembitetba dang masü saka tereprangnüsü ajak repranga angazüketter, temetetnüba ajak repranga meteter aser asen nungdak ajak mapang meindoki kanga yakyaka inyaktetter. Ajsüaka, tanü asenok tebilemsü kaji, asenoki amshiba mobile phone-ji dang 'smart' ashi, asenokbo smart masü, kanga pezübelemer, kecha memetet, ajak agi mapang endoka tamagitsü jembitsü aser amuia moi games asayatsü, anungji anepdang masü anungdang teroto ka nung tanemi saaka tangari soruchioka yutsüba chiyonger ano smart phonejisa amshitsü ta asüba lanurtem dang masü saka taintema aika lir. Asenokbo iba ama tamagitsü sobaliba, koba agi asen mapangbo ajak achir saka tagitsübo kecha mangur aser meinyaktetter, iba nung jagi piladi aser kasa smart phone-ji amshia shisatsü aser teinyaksü mapa bushidi. Atangji, ajakibo peisasa shisatsü aser mapa anguba lenmang bushia moutetter, anungji karibo sayutsüla. Iba nungdakba jagiang center aser state government anaprongla nung mapa inyaknertem asoshi teyari aser mapa angudak sentong tapu aika yangluja lir. Government mapaji item sentongtemji nübortem alidak tonga oagi angateta ashitsü aser ano külen nübortemia sentongtem indangji bushia oagi asungdangteptsüla. Item sentongtem rongnung center government nung stata government ajanga inyaksüba kaji Ministry of Micro, Small & Medium Enterprises (MSME) lir. Iba sentong ya ajanga, talisa asenok ama Scheduled Tribe kin nungi adokba lanurtem, shirnoki chiyongtsü mesüra osettsüset tapu balala yanglua business tenzükner, parnok asoshi teyari angulen lenmang lapoktsür. Atangji, teyariji mapa meinyak ser angati 'Subsidy' agitsüba masü mesüra bank nung sen apur mapabo meinyak aser sentsüa mao ta toktsütsüba masü saka lanur ka shitakba mapa inyaka takar küma alitsü nükmen tenzüktsüba sentongji MSME ya lir. Iba ama tagitsü sentongtem lanurtem nem angatetdaksünüba agi yakanü Business Association of Nagas (BAN) teloki shisalemsatep sentong ka Dimapur nung ayongzuka agiogo. Ibaji tetenzük ser Nagaland nung alir lanurtem dang mapa inyak tenzüktsü lenmang maneni sayuteptsü imlar. Asen lima ama ka nung lanur kati mapa ka tenzuka inyaksüba, temulungtetba dang lira, tamakoktsü masü. Asenoki mapa tenzüktsü atema sen makaba indang jembir aser sen maka nungji metenzüketter. Ajsüaka, jungjunga bilemdangra, sen akaba agi masü saka makaba agi sen aatsü atema mapa ka tenzükner, anungji senji tama masü saka aseni inyaksüba mapaji tama sudaktsütsüla. Aji oda, koba mapa südirsüaka aseni jangraba mapa ka asütsü tim aser asenoki yangluba mesüra adokdaksüba osettemji nübortem nungdakba aser aginübatem asütsüla. Iba amaji aseni jangraba mapa ka ajanga nübortem nungdakba ka ataloktsütsü asoshi inyaksü mulungtetdir, iba mapaji metenzükdangyongi mapa tesadang kabo takok nguogo ta bilemang. Iba ama mapa inyaknüba nisung yaritsü asoshi MSME, banks aser government department-tem nung sentong balala yanglua lir. Ibaji tesayui marura lanurtemi bushitsüla aser iba lenmangji angutsüsa BAN teloki lenisüba tajung agütsütsü imlar. Nagaland renloktsüba yang nung jagi tenzüktsü.

OLEMSABANG

Aor tesuiba putu koda lia aru ? Tang koda lir ? Tarutsü aliba putuji koda asütsü ?

~ L. Kika Pongener

Aor tesuiba putu nung koda lia aru (?) Tang kechi nung nokdaka lir (?) Tarutsü aliba lanur putu nungji koda asütsü (?)...ta tongmelang agi khen shisadangnur. Aor-ji Naga nung kin ajunga tang tamasa nuji akümba kin, Naga nung kin teimba ka asen Aor-i tamangba, shisaliok, libaliro ajak nung tenuk lapokdaksü. Anungji mapang kabo asen Aor-ji Naga nung kintemi, talisa anutoklen alirtemi Tsüngrem amai akümtsüba liasü. Ajsüaka, tanübo itum kintemi asen Aor dak tamang mekateter aser asen sulen manidaknur. Joko Naga nung kin ajak matsüngdang asen Aor menutong ka ama kümadokogo. Iba ya asenokbo junger sernung tangari nukmeremba agi asü (?) Mesura asenoki tangari asen dak tamang mekatettsüa litet (?)...ta shisadangtsüla ka lir. Ni ashitsübo ya tangar tai masü asenok tai asütsü. Asen Aor-i tambu su agi mazu asen sasa asen jenjang raksa, asen sasa aseni tangari asen dak tamang mekatettsüa lisaa-adok. Lia lia litetba kin masü masü saka lia lia lirepba kinji asen Aor asütsü. Naga nung nuji bushiba mapa tenzükdanga asen Aor-a samanir rongnung tsürabur Lt. Imkongmeren ama, aser pa den lenir tajung aika dener tenzük. Asen Aor-ia nuji bushiba mapa nung tongti shilem agia tenzükba otsü lir. Ano Nagaland state akümtsü atema tongti sua inyaker rongnung Lt. Dr. Imkongliba ama aser lenir S.C. Jamir ano tanü tashi taküm lir. Nagaland state kümteter mezungbuba Chief Minister Lt. P. Shilu Ao ama, parnoki anir taküm bendanga agüja tongti shilem agia inyakba ajanga, tanü asen Naga lima iba jenjang tashi tongtetogo. 1950s mapang nungi asen Naga lima tensa tamajung, tatsük-talem mapang India nung den yimjung yanglutsüba (Cease-Fire) mapa nung tongti shilem agia inyaker Lt. Rev. Longri ama, parnoki taküm bendanga agüja inyakba agi asen Naga lima nung nisung tajung aika taküm sama-a azu tokshiba anendaktsü. Anungji Aotsür Aortem... Asenoki asen tsüraburi tesuiba putu nung alangzuka yutsüba senmang tajungji wazuka yudi.

Tanü asen tendak asen Aotsür-Aor kechi jenjang nung nokdaka lir (?) Tang state sorkar nung ya tatishitsü ka...Chief Minister ya melenteptsüa tensa mapang ka arununga, asen Aor MLA-tem rongnung iba mendenji melenzüksüa rulling party nungjia kabo lir mali (?) Mesura aoksa-a ka...NPF party yagi anir sorkar akümtsüa tensa mapang ka arununga, asen Aor-a NPF party nungjia Chief Minister abentsüsa kabo lir mali (?) Mesura taruba General Election nungji...tang aliba rulling party NDPP ya tsükdaktsür...Congress Party-i anir sorkar aküm nunga, asen Aor-a Congress party nungjia Chief Minister abentsüsa kabo lir mali (?) Tang State sorkar Department balala nung tekolak menden (Head of the Department) nung Aotsür-Aor kwika mena lir (?) Tesasatsü-ka, asen Aor lenir Lt. Temjen Toy anojungi arishi tembangogo. Surabangla, asen lenir-i toktsüba Chief Secretary menden nungji amentsüsa tatongdak Aotsür-Aor lir mali (?) Tang Aotsür-Aor Senior Officer kwika pension alur parnok melena atutsüsa tatongdak Officer lir mali (?) Naga nung nuji bushiba mapa nunga asen Aor-a tongti shilem agia tenzükur tazungpur karbo lir mali (?) Ano Dimapur ama Commercial City nung Municipal Chairman atatsüsa Aotsür-Aor karbo lir mali (?) Dimapur nung shishilempaba (Business establishment) balala, tatishitsü agi...Vehicle Show Room, Goods whole saler, Petrol Pump, Gas etc. yamala nung, asen Aotsür-Aor Kibur (Owner/ Dealer/Agency) karbo lir mali (?) Shin o nung ka nung "Bongdang tazung (empty vessel) nungi ola tulu adoker"...ta ashiba ama-to, ozu Aor-ji kechisarena ajak nung mezungbur-a ta konang küma jembia joko meli-li, saka khen kanga junga meyipa reprangshidi. Tanübo asen Aotsür-Aor lenla ajak nung tangar sulen anidaktsüa tensa mapang kati aruogo. Joko küm ishika Aotsür-Aor UPSC Exam. nung IAS,IPS,IFoS etc. madoker, NPSC Exam. nung NCS & NPS menden nung ariana kar dak alaka tangar kin menepa madoker. Shitakba agibo Naga nung kintem dang tamasa shisaliok anguba apibo UPSC & NPSC Exam. nung IAS, IPS, IFoS, NCS, NPS etc. menden nung takok angurtemji tangar kintem dang Aotsür-Aor teimba asütsüla.

Sürabang tarutsü aliba lanur putu nungji khen ranglokdi...Nagaland state sorkar department balala nung 'Head of the Department' abentsüsa aikabo malitsü sudi. Tanü putu nung akhidang ama post tila nung 'Back-Door' nungi appoint asürtemi tekolak menden tonga atutsü makoktsü. UPSC/NPSC Exam. ajanga appoint asürtemi tang ariana tekolak menden-bo atongtsü sudi. Surabangla, tang Aotsür-Aor tangajibo oda yutsür, NCS & NPS ajangteter-a sunga, tangar kintem menepa madokra...Tarutsü aliba lanur putu nungji state sorkar nung Aotsür-Aor jenjangji kechi ka asütsü (?) Ni iba ocet zuluba ya asen Aotsür Aor meromerua lenla ajunga nung aseni dang tanishir menden ajakji tashiyim agi agitsüba, mesura malang (un-qualified) sernung tashiyim agi rakteptsüba atema ajongshirba masü, saka asen Aor tarutsü aliba lanur putu nungji koda asütsü (?)...ta khen meyipa reprangshitsü atema lemsateperba dang. Tanü Aotsür-Aor tulurtem chirnur tsürabur menden melentsüsa, mesura 'officer' akümtsüsa kwika lir (?) Ni aibelener mesura, Aotsür-Aor tulur chirnurtem teimba mozu-lar/yi-lar kümer taküm tia raksar, tsürabur nem tebilemsü khuret agütsür-ang aika alitsü sudi. Ya shiba tai (?) Tsürabur asü tanür tai (?) Ashiko, tim masüba lenmang nungi bener aruba senotsü agi zungdaksüba ajanga chirnur tia raksadaksü asü (?)...khen arok-aroka shisadangdi. Asen Aor-i jaksa-jaklema/konang amai Aor-ji ajak nung samanir/ tamapur (Pioneer)...ta jembiba ya joko endokdi. Asen Aor dak tenukmerem, mokokachi, tarishitep, kati ka majinuba, kati ka nem tenungsang magütsüba...Ibala shisatsü ya meintokra kodanga tangar memeneptsü. Aor lenir tajung kar lira pa/laji Aor-i, mesura pei yimsür/ yimer-iang atsüzuka yutsütsü merangtsü. Aotsür-Aor sempet tajung aketer kar adokra, pa/ laji Aor-iang jungnatsütsü merangtsü. Aotsür-Aor dak, pei dak alaka tangarbo shinga tajung mali ta asüba...tangar dak tajung reprangtetba jakla kheni mali. Aor senso tajungtem, asenok ajaki tesuiba putu nung Aor koda lia aru (?) Tang kong nokdaka lir (?) Asung lanur putu nungji koda asütsü (?)...ta shisadanga khen zungyangshir nukmen tasen ka tenzükshidi...Aji-ta masünungbo, asung lanur putuji Aotsür-Aor asoshi jenjang tajungbo masütsü sudi.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Taliban yimsüsüba kübok missionary kati maneni Tsüngrem tenzüksü



August 25, 2021 aonung Steubenville, Ohio nung aliba Holy Family Arogo nung Khristantemi Afghanistan atema sarasademtsüdang tangokba noksa nung angur.

August 26, 2021: Afghan nunger Khristan missionary kati alima tesem balala nung Khristantem dang Afghanistan nung underground Arogo atema sarasademjang, ta mepishi.

Minute pezü video ka nung Afghan nunger missionary kati Taliban yimsüsüba kübok pai maneni linük nung Tsüngrem tenzüksü, ta metetdaksü.

Khristan telok- Global Catalyst Ministries-i sayaba video nungji Afghan nunger tebur kati par oshi agi jembir, saka iba video nungji English subtitles lir.

"Tang linük nung aliba Khristantem tsübuteper ajisüaka onoki Tsüngremer wadang metoktsütsü," ta pai metetdaksü.

Taliban teloki Afghanistan yimsüsüba tenzükba anogo nung Afghan nunger Khristan jagi, "Aianü aser adianutem. Asenok jashiba aser temelungjang raksaba jenjangji Tsüngremi dang angateta lir. Iba linük tarutsü tiaji ni memetet. Asenoki küm 20 tashi meranga inyaka aruogo, ibayongji asenoki jashiba mazüokteter. Tesüiba küm 20 tashi meranga inyaka aruba anogo ka yongi samadokogo," ta ashi.

"Tetsüba agi masü saka linük chirepadokba agi Khristantem tenük nungi nüktzü alur, kechiyong asen linük tepor tajung atema asenok melung raksar. Tangbo iba linük kiralongrar teloki raksatsüogo," ta paisa ashi.

"Alima ajungai asenok

sendokogo. 'Onoki nenok pusemer', ta asenok dang ashirtemi tangbo asenok sendokogo aser ibaji ajanga tensa kanga mejungi aküm. Khristantem dak kechi ataloktsüar ni memetet," ta pai ashi.

"Kü tembartem, kuli ka amatanü iba video ya record asür. Iba ya puti otsü ka kümdaktsüner. Tembartem aser temeimertem nem asenok mamadokdaksüner. Ajisüaka onoki iba wadang metoktsütsü. Onoki meranga raratsü aser maneni Tsüngrem tenzükba wadang inyaktsü," ta pai metetdaksü.

Paisa alima nung Khristantem dang Afghan nunger Khristantem sarasadem nung bilemtetang, ta mepishia metetdaksü.

"Onok chirnurtem tesendokma. Yimlibilema parnok anepalung. Kü melungjang kanga yirur. Nenok medemer ajak den iba video lemsatepang," ta paisa shisem.

Taliban teloki tepuokdak nungi nisung tamajungertem, al-Qaeda aser Taliban kiralongrartem ajak chiokogo aser tang parnoki ki mita oa tsükchirtem bushir.

Taliban-i iba linük agiba sülen Khristan lenir kati Khristantem dang kidang nungi ayazüka maotsü tekümdangtsü metetdaksüogo.

International Christian Concern (ICC)-i ashiba agi, Taliban teloki tamalen sorkar den külemi inyaksemeritem anema kecha meinyaktsü ta nangzükogo, ajisüaka

Afghanistan nung taoba sorkar den inyaksemeritem aser Khristantem densema minorities kanga tsübuteper.

Afghanistan nung Khristan nütsüing 10,000-12,000 shi lir aser parnok timbaka Islam yimsü toktsür Khristan yimsü dangi meyipertem lir.

Khristantem aikati pei phone switch off süogo aser aika atsükadokogo.

Ano tanga osang ka ajanga ashiba agi, tang nisung aikati Afghanistan toktsür aotsü aritepba mapang nung US sorkar list nung temsüa alir Afghan nung Khristan aika Kabul airport nungi pei kidangi meyipa yok.

August 31 tashi nungbo tang anünga aliba US sepai 5400 pronglai iba linük toktsür aotsü anogo lemteta lir, ajisüaka nungdak dang süra anogo atsülangtsü ta osang angazüker.

White House-i ashiba agi, July ita tatembang tashi nung US-i Afghanistan nungi nisung 87,900 shi anitetogo, aser taruba anogo ishika tsüingda ano nisung meyrjang aika anitetsü.

Bodhbarnü U.S. Commission on Religious Freedom (USCIRF)-i US sorkar dang lendong ajurutsüa alir Afghan nunger minorities-a aika iba linük nungjagi anitetsüla, ta mepishiogo.

ICC-ia anüdoklen aliba linüktem dang NATO sepaitem den külemi inyaker Afghan nunger dang masü saka Khristantem densema iba linük toktsür oner ajak yaritsüla, ta ayongzükogo.

Plateau State nung Jihad kiralongrartemi Khristan 37 tepset

August 26, 2021: Mongolbar (August 24) aonung Nigera nung Plateau State kübok Jihadist kiralongrartemi Yelwan Zangam nung Khristan 37 tashi kshetogo, ta International Christian Concern-i metetdaksü.

Sepai otongdar kati, Mongolbar ayaterm mapang Yelwa Zangam nung prangpong amer telok kati ki shia mita oa nisung aika kshetogo, ta metetdaksü. Jihadist Fulani teloki Khristantem kshet asütsüa

akok ta melung malemer. Tang alima nung kiralongrar telok tamajungtibatem rongnung Fulani ya jenjang pezübuba nung lir, aser Nigeria nungbo Khristantem atema Boko Haram dang nungibo Fulani telok tamajungba.

ANO GO ABEN TSÜNGREM DEN

Tashi itshiang

"...saka Dawidi pa Tsüngrem Kibuba nung pa sasa tashi itshi." I Sam. 30:6c

Israel chuba Dawid taküm nung Kibuba Tsüngrem den tesendaktep takang yutetbaji pai Kibuba dak temulung lemteta tamang katetba ajanga liasü.

Khen mapang ka Dawid aser pa temerangertem tsükchir amaki or alidak parnok tsükchir Amalek nungertemi pa alidak Ziglak maka yimtimi mi agi rongtoktsür külen tebuttsü anati anir (Ahinoam/Abigial) tetsürtem, tila-tulu aser jala-jabasotem parnok akabatem ajak kata metepseti pua bener or liasü.

Kodang Dawid aser temerangertem Ziglaki meyipa aru parnoki item tatalokbatemji angudang parnok rongnung mang yima tejashi tulu nung ajep, aser temerangertemi Dawid dak long agi onsettsü anema noktak, idangji pai Kibuba Tsüngrem nung pa sasa tashi itshia Kibuba nungi temelaba agir tsükchir Amalek nungerji aria oa parnok ket nungi tanaben pur aoba ajak meyipa anir aru.

Khristan taküm ka nung tamang tongpang rara mapang aiben ajurur, iba mapang nung kodang timtem aser tamakok ajurudir asen tashi aser tangatetba kija nung temulung lema meli-i Tsüngrem teküzmükba tashi nung tashi itshia alitsü nungdaker.

SARASADEM

Oh! Tsüngrem, ni kü sasa dak temulung lemtetba shisatsü bentshia aliba tatok nangzüker, kü dang taochi sayuangma. Amen

Punjab nung Sikh aser Hindu nungertemi Khristantem amak



Pastor Roop Lal kinüngtsü yirur lia tangokba noksa nung angur.

Hyderabad, August 26 (Agencies): Taoba ita India nung Sikh aser Hindu nungeri Khristantem amakba sülen pastor ka kinüngtsübo tetsüing sükdanger tang tashi temang mejungi lir, ta osang ka ajanga metetdaksü.

Taoba ita Punjab kübok Fazilka district nung aliba Evangelical Church of God Tenla kidang Khristantem adenshia lia Sikh aser Hindu yimsü alia amangertem noklangnok aser süng bener arua Khristantem amakdang Khristan kabo noklangnok agi tekolak mejungi yirutsü.

Osangbener den jembidang pastor Roop Lal-i, "Parnoki Khristantem kanga mejungi yirutsü, ibayongji iba tatalokba sülen ita ka süiaka yirua alirtem tang tashi temang mejungi lir. Doctor-i onok dang kü kinüngtsü tetsüing yirua aliba zübo nungji mesen lir aser atalong lir ta shiogo," ta metetdaksü.

July 12, 2021 nü tebur 15 jagisa security camera aser Tenla ki süngküm den tanga

kiojen aika raksaja liasü, ta pastor-i metetdaksü.

Pastor Lal kinüngtsü, Raj Rani anaben tashi surgery agiogo aser arrshi küm 19, Lovepreet Singh-a tekolak zülbo 18 ben arra liasü.

July 24 nü Faridkot Medical Hospital nung Rani tetsüing surgery agi, iba sülen tetsüing-ret sükdangba melena insang inoktsü atema tanaben surgery agia liasü.

Arniwala nung police-i aibelenertem anema FIR benokogo, aser aibelenertemia tiyazü kuli agüja pastor aser par kibong anema ken o ka benok.

Iba tesem nungji mapang talangka nungi Hindu nunger aser Sikh nungertemi Khristanem anema inyaka arur. July 4 nüa Tenla kima tzü atsüingdena tangar kima yimokba mechi nung Khristantem amokmerena liasü.

Pastor Lal-i ashiba agi, iba tesem nungji tesüiba küm 21 tashi Hindu aser Sikh nungertemi par Arogo anema inyaka arudar.

India-i Nepal nem Medical Oxygen Plant ka tenla agütsüogo



August 26, 2021 nü BPKIHS, Dharan nung India-i Nepal nem 960 LPM medical oxygen plant agütsüba sentong nung Ambassador of India to Nepal, Vinay Mohan Kwatra aser Nepal State Minister of Health & Population, Umesh Shrestha na tangokba noksa nung angur.

New Delhi, August 26

(Agencies): Brihostibarnü India-i Nepal linük nem medical oxygen plant ka tenla agütsüogo, koba ajanga iba linük nungji coronavirus wara anema raraba nung yaritsü, ta ketdangsertem osang ka ajanga metetdaksü.

960 Litres Per Minute (LPM) DEBEL Medical medical oxygen plant ya Defence Research & Development Organisation-i yanglu aser ibaji India's Ambassador to Nepal, Vinay Mohan Kwatra-i Nepal Minister of State for Health, Umesh Shrestha ket nung agütsü, ta Nepal nung aliba Indian Embassy-i sangdong ka

ajanga metetdaksü.

Oxygen plant jagi khen nungi coronavirus agi shiranger 200 yaritetsü aser iba plant ji B P Koirala Institute of Health Sciences (BPKIHS) nung amenokogo.

Iba sentong nung jembidang Kwatra-i India aser Nepal na lenla aika nung tesendaktep junga lir aser India-i maneni Nepal-i coronavirus wara anema raraba nung yaritsü ta metetdaksü, ta kasa sangdong ajangasa metetdaksü.

"Nepal aser nüburtemi wara anema raraba nung India sorkari maneni yaritsü aser asenok tesendaktep junga aliba nung ajemdaker nüngdakba teyari agütsütsü," ta pai ashi.

Ano Nepal Minister, Shrestha-ia, oxygen plant ya health infrastructure atema kanga nüngdaka aliba ka liasü, aser iba plant ajanga Nepal-i wara anema raraba nung yaritsü, ta ashi.

Minister-isa, "Küm 20 tejaklen India sorkari Dharan nung BPKIHS yangluja liasü aser tang-a maneni plant ka tenla agütsüba ajanga Nepal nunger, talisa Provinces 1 aser 2 nung aliba nüburtem kanga tajangzük angutsü," ta metetdaksü.

Coronavirus agi shirangertem atema oxygen ya kanga tongtibang clinical gas ka lir aser linük anaprongla nung wara tanaben prokdang oxygen ya kanga nüngdakogo.

Aluyimertem anogo ananü mongdang tenzükogo

New Delhi, August 26

(Agencies): Yaküm November ita nungi aluyimertemi Delhi arrtsülen adenshia aluyimba ozüing tasen anema longkak ait tenzükba sülen Brihostibarnü ita 9 jungogo; iba anogomong nung aluyimertemi Singhu arrtsülen anogo ananü mongdang tenzükogo.

Anogo ananü mongdang nung linük tesem balala nungi aluyimertem, alu nung aayangertem, tetsürtem aser lanur 1500-i shilem agitsü.

Brihostibarnü senden shilem asem lemsar agiogo aser item senden nung industry nung inyakertem, alu nung

aayangertem, yimdaklirtem, sensakertem aser tribal nisungtemi timtem balala ajangshiba onüktem nung o lemtepa liasü.

Aluyimertem mongdang nungsa aluyimba ozüing asem agienang ta akhangtsü, alu nungi züsenteba ajak nung MSP agütsütsü, Electricity Bill 2021 agientsü aser Commission of Air Quality Management in NCR & Adjoining Areas Bill 2021 kübok aluyimertem anema ken o mebenoktsü atema jembitsü.

Aluyimba ozüing asem dak sendakba nung sorkar aser aluyimertem unions senden 10 ben menogo saka telemtetba

kecha magitet, kechiyong sorkari item ozüing magientsü ta tekong meranger aser aluyimertemia ozüing asemprong agientsüla, ta takhangba agütsür.

Brihostibarnü Singhu arrtsülen longkak aiterem den jembidang Bharatiya Kisan Union (BKU) lenir, Rakesh Tikait-i, "Longkak ait tenzükba sülen joko ita teku jungogo saka sorkari tang tashi ken o jembitsü memelunger. Ajisüaika asenok temelung ajema malitsüla. Iba mongdang nung asenoki tesüiba ita teku tsüingda takoksa angubattem aser tajangzük angubattem ajak asadangtsü," ta metetdaksü.



August 26, 2021 nü New Delhi nung Afghanistan tensa dak sendakba nung party ajak senden nung External Affairs Minister, S Jaishankar, Union Ministers Piyush Goyal aser Pralhad Joshi nungeri jembiba noksa nung angur.

India nung ano covid tashidak kanga putetdar; shiranger 607 süogo

New Delhi, August 27

(Agencies): India nung ano anogo shia coronavirus tashidak timba putetdar; tesüiba ghonda 24 tsüingda linük nung nisung 46,164 dak coronavirus putet aser iba tashidak agi shiranger 607 süogo, ta Brihostibarnü Union Health Ministry-i metetdaksü.

Tang tashi nung India nung nisung 3,25,58,530 dak coronavirus putetogo aser iba tashidak agi shiranger 4,36,365 süogo.

Tang linük nung coronavirus agi teshirangdakpur 3,33,725 lir, aser ibaji coronavirus caseload nungi shilem 1.03 lir, ta anepdang 8:00 ako nung Union Health Ministry-i metetdaksü.

Ano tanga osang ka nung, Brihostibarnü health ministry-i,

linük nung iba wara azüoktsü atema September aser October ita na kanga tongtibang asütsü, kechiyong ita ana nungji benjung aika ajangshitsü, anungji coronavirus wara anema tetuyubatem shidak bentshüla, ta metetdaksü.

Osangbenertem den jembidang Union Health Secretary, Rajesh Bhushan-i, tang tashi asen linük nung coronavirus wave tanabuba ano mesüingjem, ta metetdaksü.

Paisa, tesüiba ghonda 24 tsüingda linük nung coronavirus vaccine dose lakh 80 dak tema agütsüogo, ta metetdaksü.

Afghanistan nungi nisung 400 dak tema anir aruogo, aser parnok kar dakbo coronavirus putetogo, ta paisa metetdaksü.



August 26, 2021 nü Kolkata nung Mother Teresa asoba anogomong nung la leper anasa Superior General of Missionaries of Charity, Prema aser nun temi la bilemteta sentong agidang tangokba noksa nung angur.

India-i longjemer Afghanistan tensa atema inyaktsü: EAM Jaishankar

New Delhi, Luroi/August 26

(Agencies): Brihostibarnü India External Affairs Minister, Dr S Jaishankar-i, linük telongjem nung India linüki Afghanistan tensa atema inyaktsü, ta metetdaksü.

Brihostibarnü yimtenren party ajak senden nung Jaishankar-i Afghanistan tensa osang metetdaksüba sülen osangbenertem den jembidang pai, "Iba onük atema ajak tangatetba kasa dang lir aser Afghanistan atema ajak longjemer inyaktsü," ta metetdaksü.

Afghanistan tensa atema party ajak senden ghonda asem ser tesadang amen aser iba senden nung party 31 nungi lenir 37 aden. Senden nung MP temi asüingdangbatem EAM-i langzua liasü.

India sorkari Devi Shakti mission kübok Afghanistan nung aliba India nunger anir arudar, aser tang tashi nung IAF tayimtsü ajang India-i nisung 565 anir aruogo; parnok rongnung Indian Embassy nung inyaker 175, India nunger 263, Afghan nunger 112 aser bendanger 15 densema lir, ta Jaishankar-i metetdaksü.

EAM-i, "India sorkari India nunger timbaka anir aruogo, ano parnok ishika anünga lir saka yashi parnok tayimtsü nung anir marutet. Ajisüaika onoki ajak anir

arutsü," ta metetdaksü.

India nunger anir arutsü atema August 16 nü India-i Afghan special cell tenteta liasü aser tang tashi nung iba cell dangi call 3,014, WhatsApp ajang osang 7,826 aser emails ajang osang 3,101 aruogo; iba cell ya MEA ketdangser 20-i acchaayanger.

Party ajak senden nung EAM-isa Herat aser Jalalabad nung aliba Indian Consulates nung inyakertem khenpiga atema anir aruba, Kabul nung aliba Indian Embassy tera shibangba, Kandahar nungi nisung anitetba aser mapang shia tekümdangtsü osang metetdakja aruba osangtem Jaishankar-i metetdaksü.

"Sorkari tekaratiba nung senso ajak anir arutsü atema inyakdar. International telemtetbatem dak sendakba nung asenok shilem aser inyakyim agizüker. Onoki partners linük ajak den tongtepratepa inyakdar," ta paisa metetdaksü.

EAM-isa, mapang shia Airport nung aser Kabul nung injang yokba ajang sensotem anir aruba maparen nung tetsükdaksü ajangshiba, telok balalai points nung nisung mita reprangba aser tayimtsü anenzüktsü atema menoa temelaba agütsüba osangtem metetdaksü.

Afghan nunger dang Kabul airport nungi ainshitsü ashir



Chaman, Pakistan nung aliba 'common border crossing' ajanga Afghan nungertem Afghanistan-i aotsü atema atatepa aliba noksa ka yangi angur. Kinunger semdangtsü, temang anepalutsü aser shishilempaba maparen balala inyaksü atema anogoshi Pakistan aser Afghan nunger iba arütsü ya alema senzür. Tang Kabul nungi nüburtem anizüker aoba mapang ka nung liaka Pakistan-i arütsü nung tenokdangba agüja mali.

Kabul, Luroi/August 26 (Agencies): Anüolen linüktem nungi sepaitemi August 31 matongdang akok tashi nüburtem anizüker aotsü aritepba mapang Islamic State (IS) telungpuri kiralongra mapa inyaksü akok ta tetsübu nung United States aser külem linüktemi Brehostibarnü nüburtem dang Kabul airport nungi ainshitsü ajungshia liasü.

Taliban den küm 20 raradang anüolen linüktem yariba Afghan nunger aser bendanger meyrirjang aika iba linük nungi anizüker aotsü tebilemstü tuluba akumer, kechiaser US aser allied sepaitem ya taruba hopta iba airport yutsür ainshitsü lir.

Bodhbar nikonkdang tekümdangtsü osang ka sangdongba mapang Kabul nung aliba US embassy ajanga nüburtem dang airport-i maotsü ajungshi aser yangji oa gate nung alirtem tekeraba nung yutsür ainshitsüla, ta ashi.

Britain-ia airport tesem nung

aliba nüburtem dang ainshitsü shiogo aser IS telungpuri takum bendanga agütsür bomb pokloktsütsü amai itdangiter nungi angazükba tali tejangjaba akumer, ta par armed forces minister James Heapey-i ashi.

"Ni iba tensa indang abensa meshitetsü. Lendong ya tejangja aser ataloktsüsa, ibai tesashi alitsü. Onoki tejangja nung süoki ia meblem asübo ya mejembila," ta Heapey-i ashi.

Australia-ia nüburtem dang airport nungi pila alitsü shiogo aser lendong ataloktsü tetsübu nung Belgium-i par nübur anizüker aoba maparen tembangogo. Dutch sorkaria tekumtangtsü osang sangdongogo aser tayimtsü tatembangba ya Brehostibarnü aotsü imlar, ta ashi, anungji Netherlands-i aotsü temsüa alir kar yutsür.

Tekumtangtsü osang sangdongaka airport gate temalen nisung onsara adenshia lir, ta Kabul nung aliba Western diplomat kati ashi.

Taliban, shirnoki airport temalen tanükba agütsür, parnok ya Afghan nung aliba Islamic State asoshi tsükchir lir. Afghanistan nung aliba Islamic State dang ya Islamic State Khorasan (ISIS-K) ta ajar.

"Ozü telok nungi tanükertem takum bendanga agütsür Kabul airport anüker, Islamic State telok nungi parnoka amokmerener," ta Taliban ketdangtsür kati ashi.

August 15 nü Taliban teloki Afghan yimtiba, Kabul amokbangba sülen bendangertem jenti aser parnok kinungertem aser Afghan nunger kar iba airport nungi anizüker aoba mapang iba tekumtangtsü osang ya arur.

Anüolen linüktem nungi sepaitemi airport nung tekeratiba nung par nüburtem anizüker aotsü merangba mapang nisung meyrirjang aika iba tesem nung adenshia lir, shirnok Taliban-i yimsü asüba linük yutsür jena aotsü meranger.

Rongsenketzüing mechi N Korea indangparliament adenshitsü

Pyongyang, Luroi/August 26 (Agencies): North Korea indang rongsenketzüing sentong aser danga onüktem jembitsü asoshi pasasa temelaba agütsüba parliament, Supreme People's Assembly (SPA) ya taruba ita adenshitsü, ta state media ajanga ashi, kong rongsenketzüing tsütsü jenjang tamajungba akumer.

September 28 nung amentsü aliba senden nungya linük rongsenketzüing sentong yanglushitsü aser nungitshitsü, yimti aser linük terenlok, shisaliok aser recycling dak sendakba tzüzüing-ozüing asadangshia jembitsü, ta KCNA news agency ajanga Brehostibarnü ashi.

North Korea indang parliament ya aiben mamener aser yangji linük indang tashi tait Workers' Party ajanga yanglua aliba sorkar inyakym aser budget amala agizüksü asoshi telemtetba agir. Assembly nungya Workers'

Party indang züingsem timba lir. Parliament ayongzüksü asoshi telemtetba ya SPA indang standing committee senden ka Mongulbarnü amenba mapang lemtet, ta KCNA ajanga ashi.

Küm 23 nung North Korea indang rongsenketzüing ya 2020 küm tamajungtiba akum, kong UN ajanga tanen makai tenokdangba agütsüba den COVID-19 lockdown aser tzüingsang-mopung majungba agi tia mejungi kumdaksü, ta South Korea indang central bank ajanga asadangtet.

North Korea nung tang tashi COVID-19 tashidak puteta mali saka arütsü shibangba aser iba tashidak nungi kumzuka alitsü mera tesashi agiba ajanga iba tashidak wara ya linük mesamai alitsü mera ka amai ajiteter.

Coronavirus tashidak wara agi tesem ajunga asungba aser taoba küm typhoon ajanga linük nung chiyongtsü tensa mejungi

lir, ta June ita North Korea lenir Kim Jong Un-i shia liasü.

Taküm meyi mapang ano yipru tesashi arua aluruba nung kongshitsü akok, ta shisabulur.

Linük nung tang rongsenketzüing jenjang ya 1990s mapang kanga makamaitba aser yasa-tzuraba jenjang den kasa lir, ta Kim-i küm tetenzüklen ashi aser nüburtem dang rara tesashi atema renema alitsü ajungshia liasü.

Party nung lenir kar melenba sülen parliament ya amentsü lir. Workers' Party indang Central Committee nung vice chairman, Ri Pyong Chol densema lenir kar mapa nungi anentsüogo, ta South Korea indang Yonhap news agency ajanga ashi.

Constitution kübok parliament ya tashi tulutiba aketba tenük-telen ka amai züingshir, saka yangi ruling party ajanga lemteter aliba onüktem ajak junga masadangi agizüker.

Venezuela tzümetzung nung asür nisung 20 jungogo

Caracas, Luroi/August 26 (Agencies): Venezuela anüolen Merida state nung tzüinglu kanga sashia aruba ajanga molushi yimzuka alua aser ayongtem mubanga tzü ayimba zülen nisung 20 shi takum samaogo.

Merida nung tang yimsü tesüdak Socialist Party ketdangtsürtemi Bodhbarnü state TV ajanga asürtem timba kumogo aser tesem kar nung ketdangtsürtemi telephone service tanaben agütsütsü meranga inyaker, ta sangdonga liasü.

State governor Ramon Guevara-ia nisung aliba ki 1,200 dak tema raksaogo aser nisung 17 samar bushir, ta shia liasü.

"Asenoki ibai yimtenren mesüra tangatetba balala tsütsü menungtsüli. Iba tebilemstü asoshi asenok ajaki lenmang bushiti," ta Democratic Action opposition party nung züingem, Guevara-i ashi.

Social media nung noksa prokshiba nung lenmangtem nungi gari metsungzuka bener aoba, ki aser businesses tem molushi agi mubangba aser molushi nungzuka alur lenmang nung longsang prokshia aliba nguogo.

Tovar, Bailadores, Zea aser Santa Cruz de Mora densema jila aoka nung tzümetzung agi transformer raksaja electricity mali kumogo, ta Guevara-i ashi.

Item tesemtem nung teyari agütsütsü asoshi state mesüra municipal sorkar dak tashi mali, ta pai ashi saka ki-o-jen yanglutsü mongintem dang Caracas den lungjemer ki aser lenmang yanglushitsü ayongzük.

Oil Minister Tareck El Aissami-i timtem nung alirtem kumzükba maparen inyaker nem totzü peria agütsütsü shiogo, ta Tir Nicolas Maduro-i Mongulbarnü shia liasü.

Lenmang aser apu raksaba den külemi municipality 87 nung nisung 54,543 dak iba tzümetzung yagi kongshiego, ta Interior Minister Remigio Ceballos-i state TV dang Bodhbarnü ashi.

Merida, Tachira, Zulia, Apure, Amazonas, Bolivar, Delta Amacuro, Monagas aser Aragua state tem ya state of emergency nung lir, ta pai ashi.

Item tesemtem nung aliba sepaitem den yariteptsü asoshi Merida nungi firefighter 80 aser Civil Protection ketdangtsür 60 yoksema lir.

Merida indang city centre nung teyari bendenba tesem ka amenoktsü asoshi Guevara-i ketdangtsürtem dang ashi, kong parnoki tzü, shisa maoba chiyongtsü aser aben-süoshi bendener. Tzümetzung agi tesashitiba kongshiba tesem nung Guevara-i health worker tem yoka lir.

Japan nung Moderna doses million 1.6 mamshi atar



Tokyo, Luroi/August 26 (Agencies): Japan nung Moderna mozü menener aliba mechi doses million 1.63 mamshi yua lir.

Mozü bongdang (vials) 560,000 shi aliba batch ka nung "foreign materials" liasü, ta health ministry ajanga ashi.

Japan nung iba mozü ya Takeda Pharmaceutical ajanga ayoker aser alemer, aser parnoki Moderna ajanga kumtangtsü atema batches asem tashi soita yua lir, ta ashi.

Spain nung iba mozü yangluba tesem ka nungi timtem ya adok südi, ta ashi saka iba dak tali rasaa mashi.

"Tanü tashi iba mozü ajanga timtem agütsüba jangjateta mali. Iba ken o tali bushisungdangtsü atema ozüing amshir aser Takeda den külemi inyaksü," ta Moderna ajanga ashi.

Iba mozü nung aliba "foreign objects" ya kechiar osang tejangja mali saka Takeda-i ibai 'particulate matter' lir ta ashi aser parnoki aritepa

asadangogo, ta ashi.

Mozü menener aliba osang ya ano danga vaccination centre tenet nungi aru, kong vials 39 mesüra doses 390 menener liasü, ta Japan Times osangkaket ajanga ashi.

Mozü menena aliba mejangjatet dang agir alinungbo itemji metettsü asoshi health ministry ajanga batch number tem sangdongogo, ta Japan Times ajanga ashi.

Japan nung COVID-19 cases timba akumer, kong Bodhbarnü prefecture talila ti nung state of emergency sangdongogo.

Japan yimtiba, Tokyo nung tang Paralympic Games ayongzuka agiba mapang lir.

Iba linük nung Pfizer aser AstraZeneca mozü amshitsü tamalen mela liasü aser Moderna amshitsübo May ita ang mela.

Japan nunger shilem 40 dang tera agi timba vaccine dose anaprong agiogo aser shilem 50 shi dose mezüingbuba agir lir.

Assam Rifles-i sentong balala ayongzük

Dimapur, Luroi/August 26, 2021 (TYO): Bodhbarnü (25.08.2021) HQ IGAR (North) kübok Changlang Battalion - Assam Rifles-i "Ek Bharat Shrestha Bharat" omen nung ajemdaker Ranglum village, Changlang District (Arunachal Pradesh) nung career counselling campaign ka ayongzük, ta sangdong ajanga metetdaksü.

Lisopurtem dang Armed Forces aser Sorkar office nung mapa balala indang maongka tem metetdaksütsü nükjidadong nung iba sentong ayongzükka liasü.

Iba sentong agiba mapang, lanurtem dang recruitment/selection indang inakyimtem metetdaksü aser item maongka agitsü asoshi jangra alirtem yaritsü asoshi team-i nangzük.

Lanurtemi Assam Rifles pur tasa pelashishia agizük aser lanurtem ajangzükdaksütsü nükjidadong yur iba campaign takok ngua ayongzükba atema parnoki Assam Rifles dang pelaba metetdaksü.

HQ IGAR (North) kübok Kiphire Battalion - Assam Rifles-i Hoshepu village, Kiphire District nung tongtibang nübu den sensaksemtsü asoshi, August

22 nungi 23, 2021 tashi yimtsüng pezü nung medical camp ka ayongzük.

Iba medical camp mapang, Khekiye, Khewoto, Hoshepu aser Khetoi yimtsüng nung nisung nisung 90 shi anepaluogo aser iba den külemi parnok temang nung timtem den apet mozü balala agütsüogo. Kasa mapang, Kiphire Battalion-Assam Rifles-i Hoshepu yimtsüng nung tongtibang nübu den ajurutepa sensaksema liasü.

Tesem tezü nung security tensa dak sendakba nung onük tem benoka jembishinütsü nükjidadong nung Assam Rifles-i iba senden ayongzük, kong Hoshepu yimtsüng nungi tongtibang nübu pezü agi seden nung shilem agiogo.

Iba den külemi, Sadbhavna project kübok VCC atema Desktop computer ka alizüktsü asoshi inyakba maparen, koba taoba mapang benoka liasü iba inakyim tembangogo.

Kasa senden nung, North-East nung yimji-yimjung asoshi, security forces aser tesem tezü nung alir yimtsüngtem tsüngda tangatetep nung tesendaktep aser telongiem alitsü asoshi onük benoka sensaksema liasü.

Maneni, iba senden nung yimtsüng nungi tantsü tambu, GB, chairman aser secretary tem denogo. Assam Rifles dak temolung lemtettsüsa, Kiphire Battalion ajanga medical camp den iba senden takok ngua ayongzükba atema yimertemi Assam Rifles dang pelaba metetdaksü aser tesendaktep akangshitsü mechi tarutsü nunga iba ama sentong ayongzüktsü asoshi yimertemi team dang mepishiogo.

Bodhbarnü (25.08.2021) HQ IGAR(N) kübok Shamatore Battalion - Assam Rifles-i Noklak kübok Longdon Baptist Church nung teyari agüja liasü.

Lokti senden aser Arogo dak sendakba sentong balala nung amshitsü asoshi moapu ka yanglutsütsü atema Longdon yimer aser Arogoi Noklak AR Post dang astügdanga liasü.

Iba dak sendakba nung, Noklak Post nungi JCB excavator' ka yoka Longdon yimer aser Arogo tebilemba ataloktsüogo. Nübur nungdakba ajiteta yariba atema Noklak nung alir aser Longdon Baptist Church-i Assam Rifles dang pelaba metetdaksü, ta kasa sangdong nung shia lir.

TEPELA TASOBA ANOGO

Tenüng : Yatimen
Tasoba anogo : 27 August
Küm : 3
Talidak : Akhoya

Tanü na asoba anogo tulu tepela nung mongtettsüsa anogo tajung moatsü nung Tsüngrem tenüng asanger. Maneni Pa temoatsü nung ne taküm aniang ta onoki sarasademtsür.

Oja, Oba, Oya & Kinungertem.



**In the Court of
Principal District & Sessions Judge
Mokokchung : Nagaland**

S/C NO. 164/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late A. Lanunungsang has been applied by Smti. Pangerkumla W/o Lt. A. Lanunungsang R/o H.No 39 Dibuia Village, Mkg. Nagaland for possession of:

GPF, GIS, Gratuity, Leave encashment, Pension etc, Closing of A/c

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 26.9.2021 Given under the hand and seal of the court on this the 26.8.2021

Sd/-

**Principal District & Sessions Judge
Mokokchung: Nagaland**

DIG Sarmah-i DHEP Wokha semdang

Wokha, Luroi/August 26, 2021 (TYO): Mongolbarnü (24.08.2021) Director Inspector General (DIG) Central Industrial Security Force (CISF) North-Eastern Zone (NEZ) Headquarter, Guwahati, Siddhartha Sankar Sarmah-i, Doyang Hydro Electric Project (DHEP) kübok CISF unit station semdanga liasü, ta sangdong ajanga metetdaksü.

DIG-i DHEP ketdangsurtem den senden ka amen aser tentet ana tsüngda tesendaktep tajungba yanglutsü asoshi parnok den sensaksema liasü. Sainik Sammelan nung jembiba mapang Sarmah-i, exercise ajanga temang aser tekolok anema alitsü asoshi security unit (Jawans) ajungshia liasü aser tangar sobaliba meteta kümdanga alitsü aser lisopurtem den tesendaktep tajung ayutsü asoshi mepishiogo.

Yimji-yimjung ajungkettsütsü asoshi Unit ajanga achayangba 'community outreach programme' nung shilem tajung agitsü; aser iba den külemi lemzüktsüba wadang (duty)

inyakdang, teti COVID-19 Standard Operating Procedure (SOP) nung anidaksü asoshi pai jawan tem ajungmesogo.

Kasa anogo, DIG Sarmah-i Doyang Hydro Electric Project plant kübok duty post ajak semdang aser jawan tem den sensaksema liasü. Iba den külemi, unit ajanga achayangba 'sapling plantation site semdangogo, koba community outreach programme atema inyakba mapatong ka lir.

Maneni, lisopurtem ajangzükdaksütsü asoshi, DIG-i, canteen ana - sanrakshika aser wet canteen den multipurpose gym semzüktsüogo. Iba sülen, unit ajanga ayongba soccer aser badminton match nung pa dena liasü, kong exhibition match nung temeküt yimtsüng temi shilem agiogo.

Director Inspector General den Group Commandant, CISF Group HQ Guwahati, Harendra Narayan-i Doyang Hydro Electric Project (DHEP) kübok CISF unit station semdanga liasü, ta kasa sangdong nung shia lir.

'Dance Deewane 3' nung Alka Yagnik aser Kumar Sanu nati shilem agitsü

New Delhi, Luroi/August 26, 2021 (Agencies): Bollywood nung nungtugu kentener, Alka Yagnik aser Kumar Sanu nati alakteta tejaoker ama 'Dance Deewane' nung shilem agiba angutsü.

Dance Deewaane nung shilem agirtemi (contestants) Alka aser Sanu nati 90s mapang atenba ken balala nung tsüungsangtsü.

Iba show nung tetendanger temji Madhuri Dixit, Tushar Kalia aser Dharmesh Yelande nung lir.

Dance Deewaane nung shilem agir, Aman-i 'Charlie Chaplin' act ka sayutsü aser iba sülen, Aman aser show nung alakteta tejaoker tsüngda

'jugalbandi' (nisung anati atenba ken) alitsü, kong kentener anapronglai - Alka Yagnik aser Kumar Sanu nati 'Mere Khwabon Mein Tu' ken atenba mapang, Aman-i beatboxing asütsü.

Somansh-ia act ka sayutsü renema lir aser iba sülen, Kumar Sanu aser Madhuri nati sabang nung shilem agitsü.

Kasa show nung, shilem agir (contestant) Pallavi-i 'Aankho ki gustakhiyan' ken atentsü.

Iba show sentong nung, Alka Yagnik-i kentener ka ama la indang ken 'Ek Do Teen' nungtugu akümba indang telok den lemsateptsü.

'Dance Deewane' ya COLORS channel nung sayudar.



Peren, Luroi/August 26, 2021: Brehostibarnü, Lamhai Namtsi Police Check Point, Jalukie nung Peren Medical Department-i tapi agi Covid-19 tendanga aoba (Random Covid-19 Test Drive) mapang tangokba noksa ka yangi angur.

GOVERNMENT OF NAGALAND DIRETORATE OF TECHNICAL EDUCATION NAGALAND: KOHIMA

NOTIFICATION

NO. DTE/ ESTT-2/02/2021-22/: This is to inform the candidates who have appeared Nagaland State Entrance Examination (NSEE-2021) that Central Agricultural University, Imphal, Manipur and Assam Agricultural University, Jorhat has allotted 15 more seats to Nagaland for study of various Agri. & Allied/ Engg. Under-graduate degree courses for the session 2021-22: The following courses are given below.

Sl. No.	Branch	No. of seats	Eligibility	College/ Institute	Remarks
1	B. Tech. (Food Technology)	04	Passed 10+2 with PCM/ PCMB 40% marks for SC/ST/PC candidates	(i) College of Agri. Engg. & Post Harvest Tech. Gangtok, Sikkim. (ii) College of Food Tech., Imphal, Manipur	Central Agricultural University seats
2	B. Tech. (Agricultural Engg.)	05	-do-	College of Agri. Engg. & Post Harvest Tech. Gangtok, Sikkim.	-do-
3	B. Sc. (Hons) Food Nutrition & Dietetics	02	Passed 10+2 with PCB/ PCBM/ PCM 40% marks for SC/ST/PC candidates	(i) College of Home Sc. Tura, Meghalaya (ii) Assam Agricultural University, Jorhat	*Female only for CAU Seat *Self Finance for Assam Agricultural University seat
4	B. Sc. Community Science	04	-do-	(i) College of Home Sc. Tura, Meghalaya (ii) Assam Agricultural University, Jorhat	*Female only for CAU Seat *Self Finance for Assam Agricultural University seat

Interested candidates may collect the prescribed application form from the office of the undersigned during office hours on payment of Rs. 200/- (Rupees two hundred) only. Form can also be downloaded from Department website: www.dtenagaland.org.in.

Last date for issue and submission of complete application form is 3rd September, 2021.

Sd/-
(Nungsangmenlalmchen)
Ex-Officio Director

G Sathiyani-i Czech International Open kokogo



Olomouc, Luroi/August 26, 2021 (Agencies): Czech Republic kübok Olomouc yimti nung ayongba Czech International table tennis tebur final nung, India nung G Sathiyani-i Ukraine nung Yevhen Ryshepa madak takok nguogo. Bodhbar aonung, tebur kija final asaya nung Sathiyani-i 11-9, 11-6, 11-6, 14-12 agi Yevhen tsükdaktsür sülen, iba title takok angu. Iba asayamung densema, Sathiyani-i tasembuba ITTF title takok angur asütsü.

Semifinal nung, Sathiyani-i Sweden nung Truls Moregard madak takok ngur sülen, final asaya liasü. Iba round (semifinal) nung, Sathiyani-i terberem nung tashitsü atuba ajanga pai set tasembuba tembanga masayatet, saka mezüing aser tanabuba set akokba yong final asayatsü atema pa temsüa aküm. Sathiyani-i 11-4, 11-8, 8-2 agi Moregard tsükdaktsü.

Taoba hopta, Truls

Moregard-i WTT Contender Budapest takok ngur sülen, Czech International nung asaya liasü.

Quarterfinal tetoktepa nung, Sathiyani-i Saudi Arabia nung Ali Alkhadrawi tsükdaktsü aser aji masüdüng pre-quarter nung pai Russia nung Sadi Ismailov madak takok angu aser round of 32 nung top seed Sathiyani-i Czech Republic nung Tomas Koldas tsükdaktsü. Iba asayamung tenzüker nungi tatem tashi Chennai nung soa intetsang Sathiyani set ka nung danga tamakok mangu.

Belgium Open 2016 aser Spanish Open 2017 takok ngur sülen, Czech International asayamung nung Sathiyani-i ITTF Challenger title tasembuba takok angur asütsü.

"Bilemba ama asayatetba den külemi set ka nungdanga tamakok mengui 'men's singles title' takok anguba asoshi pelar. Küm pezü sülen, tasembuba ITTF title takok angur asütsü,"

ta Sathiyani-i lemsatep.

Sathiyani-i pa indang coach S Raman, shiba taoba mapang national champion lir, pa dang pelaba lemsatepa liasü.

"Tenokdangba tulu tila ajak kokteta asayatsü asoshi pai (Raman) teti shisatsü nung nungitta aru," ta Sathiyani-i ashi.

Iba asayamung final nung, arishi küm 28 tain Sathiyani-i 'forehand', 'backhand' aser 'sidespin' tasa amshia asaya.

Taoba hopta, Budapest kübok ayongba 'WTT Contender' asayamung nung, Sathiyani aser külem India tsür Manika Batra nati temeyoktep tarep title takok angu.

Tang, ITTF world ranking nung, Sathiyani aser Manika (temeyoktep tarep) na jenjang 20buba nung lir. Ajisüaka, Budapest asayamung men's singles nung seed temaba nung asaya yongjia, Round of 16 nung Sathiyani tsükdakok.

Budapest asayamung nung, külem India nung trok - Manav Thakkar, Snehit Suravajjula, Sreeja Akula, Archana Kamath, aser Jeet Chandra nungeri takok mangu. Seed 10buba Archana-i tetsür kija semifinal tongtet, saka Russia tsür Mariia Tailakova-i 11-8, 4-11, 11-13, 12-14, 11-9, 10-12 agi Archana tsükdaktsü.

Tebur kija asaya nung, Manav aser Snehit Suravajjula naprongla round of 16 nung tsükdakok.

Temeyoktep tarep nung Manav aser Archana naprongla seed tanabuba nung liasü, saka quarter final nung tenaprongla tsükdakok.

Tebur tarep semi final nung, Snehit Suravajjula aser Jeet Chandra nati England-Sweden tarep Samuel Walker aser Truls Moregard makok.

'Indian Wrestling' atema UP Sorkari cr. 170 agütsütsü: WFI

New Delhi, Luroi/August 26, 2021 (Agencies): India nung Wrestling saisapong ajungkettsütsü nukjidong nung, kisü-jensü (infrastructure) maparen aser 2032 Olympics tashi India nung wrestler tem yaritsü asoshi Uttar Pradesh Sorkari sen cr. 170 shi agütsütsü imlar, ta WFI President Brijbhushan Sharan Singh-i ashi.

Wrestling Federation of India (WFI) President, Singh-i ashiba agi, Odisha Sorkari linük nung hockey saisapong tsütsü nungittsü lemtetba mapatong ajanga onok ajungmeso aser iba saisapong (wrestling) tsütsü yaritsü asoshi onoki Uttar Pradesh Sorkari den ajurutep.

"Odisha ya State tilaka dang süaka, parnoki senotsü agüja hockey saisapong tsütsü nungittsü lemtetogo, ajiasünung

Uttar Pradesh ama State tulu kati wrestling tsütsü kodaser meyaritetsü ta onoki bilem. Onoki State (UP) Sorkari den ajurutep aser CM Yogi Adityanath-i onok tebilemba agizükogo," ta Singh-i ashi.

"2024 Games (cr. 30) tashi küm shia sen cr. 10 (ter ter) aser 2028 Olympics tashi küm shia sen cr. 15 (cr. 60) aser tatesa 2032 Olympics tashi küm shia cr. 20 (cr.80) agütsütsü asoshi onoki UP Sorkari dang asüngdangogo," ta Singh-i ashi.

"Iba sentong mapa kümra, linük nung tongtibang wrestler tem dang masü, saka Cadet jenjang nung wrestler shia sponsorship angutsü aser national champion wrestler nem senpet agütsütetsü," ta pai ashi.

2018 küm WFI-isa Indian

wrestling indang 'principal sponsors' ama Tata Motors aniok aser iba partnership ajanga cr.12 teyari nguogo. Iba sponsor ajanga Tokyo Games tashi Federation-i wrestler nem central contract agütsütet.

Iba mapatong ajanga, training aser 'exposure' atema onoki linük nungi Cadet wrestler tem bendangleni yoktetsü. Wrestling saisapong temaba jenjang kati ajungkettsütsü nungdaker," ta Singh-i ashi.

Tang, WFI-i junior wrestler 60 nem ita shia sen 7500 aser Cadet wrestler nem sen 5000 agüja yaridaki. State Sorkari den tenangzüktep agiba sülen, Wrestling saisapong nungittsü asoshi nija NGOs talisa JSW aser OGQ tem anioktsü/melatsü asoshi WFI-i sentong yanglutsü.

Taküm Imchaba Memorial Nagaland Open V/ball asayamung mekateter

Mokokchung, 26 Aug mesüngjemtetba yong (TYO): 15 buba Imchaba mekateter, ta tayonger Master Memorial Nagaland Mokokchung District Volleyball Association (MDVA) tir - koba taküm 2021 küm ayongtsü liasü, ibaji covid-19 wara ajanga alima tensa tia metetdaksüogo.

US Open nung Venus Williams masayatsü



New Delhi, Luroi/August 26, 2021 (Agencies): Aruya aliba US Open nung Serena Williams-i shilem magitsü asoshi Bodhbarnü osang sangoktsüba sülen, la adianu Venus Williams-a tetsüing nung timtem aliba ajanga iba Grand Slam asayamung nungi tukuogo.

Iba asayamung nung shilem agitsü asoshi US Open achaayangertemi Venus Williams nem 'wildcard entry' agütsü, saka la temang nung timtem aliba meteta, tongti asayar iskika den külemi iba Grand Slam nung Venus masayatsü.

Venus den la adianu Serena Williams densema, 2020 Australian Open takok angur Sofia Kenin, 20ben men's Grand Slam champions Rafael Nadal aser Roger Federer den taoba US Open takok angur Dominic Thiem nung iba asayamung nungi tukadokogo.

Anaben US Open champion aser taoba mapang, world no. 1 Venus-i social media sabang ajanga iba osang sangdonga liasü.

"Serena künaprongla US Open nung shilem magitsü," ta Venus-i ashi.

"US Open nung shilem magitetsüsa akümer. Kanga dang tezütatanger. Taküm tsüklawa mongpu piyong tetsüing nung timtem ajanga kangshia aru aser tang tashi taneptsü junga mengutet," ta Venus-i lemsatep.

Arishi küm 41 tain Venus, shibai Grand Slam title tenet ngua lir, lai ashiba agi, ni sapuba 'Slam' kanga menunrar aser iba asayamung nung shilem agitsüpur tanga asayar ajak dang tajungtiba nung asayatsü asoshi lai lemsatepa liasü.

Venus tenu Serena-a temang nung timtem aliba ajanga US Open nung shilem magitsü osang jangjatsüogo. 2003 küm

nungi iba asayamung nung adianu anapronglai shilem agia arur sülen, taküm Flushing Meadows kübok iba asayamung nung tenati masayatsü osang sangdongba ya mezüing asütsü.

Tawa, World no. 5 Sofia Kenin dak Covid-19 positive putetba ajanga, la iba asayamung nungi tukadokogo. Sofia-i, vaccine agiyonga, kü dak iba tashidak puteta liasü, ta ashi.

Kenin-i 2020 Australian Open takok angu aser taoba küm French Open asayamung final nung la runner-up liasü. Taoba küm US Open nung lai round pezübuba tongteta asayaogo.

"Mapang shitak nung vaccine agiba yong kü dak iba tashidak putet yongjia, iba wara temaitsü agi kangshibabo mali," ta Sofia-i lemsatep.

"Ajisüaka, iba wara nungi taneptsü (Covid-19 negative) manguba yong, taruba hopta US Open nung shilem magitetsü," ta lai ashi.

Taküm indang Grand Slam tennis asayamung Hombarnü New York nung tenzüksü, kong terepranger shilem 100% densema iba asayamung asayatsü terenemba lir. Taoba küm, Covid-19 wara ajanga terepranger medeni iba asayamung ayongzüka liasü.

"Iba timtem nungi yakta taneptsü angutsü asoshi temang anepalua amungtsü aser taküm küm tatemlen asayamung nung tajungtiba shilem agitsü asoshi renemtsü. Mapang ajak nung shisatsü agi nungita yariba atema nenok ajak dang pelar," ta Sofia-i lemsatep.

Sofia Kenin tetsüing nung timtem aliba ajanga, June 30, 2021 nü Wimbledon round tanabuba nung tamakok ngur külen nungi lai asayamung ka nung danga shilem magi.

BILEMDANGANG

"Meinyaki dang bilemba agi maparen mekoktetsü."